

Alþingi
Fjárlaganefnd
sent rafrænt nefnasvid@altingi.is

Umsögn. Fjárlög 2018, þingskjal 1, 148. löggjafarþing.

Umsögn Fjórðungssambands Vestfirðinga skiptist þrjá hluta. Fyrir það fyrsta, ábending um breytingar á vinnufyrirkomulagi í samskiptum landshlutasamtaka við framkvæmdavald og löggjafarvald. Í öðru lagi er vakin athygli á mismunandi hagþróun landshluta sem ekki er í takt við efnahagsforsendur fjárlagafrumvarps. Í þriðja hluta er komið á framfæri ábendingum um nokkra málaflokka, en vegna hins skamma tíma sem frumvarpið er til umfjöllunar tekst ekki að fjalla um önnur mikilvæg málefni.

Nýtt vinnulag í samskiptum fjárlaganefndar, ráðneyta, landshlutasamtaka sveitarfélaga og sveitarfélaga.

Í framhaldi af breytingum á lögum um opinber fjármál, hefur Fjórðungssamband Vestfirðinga ásamt öðrum landshlutasamtökum sveitarfélaga gert kröfu um breytt vinnulagi í samskiptum við Alþingi og ráðuneyti um fjárlagagerð og ríkisfjármálaáætlun. Draga má málið saman í tvo meginþætti.

- Ríki og sveitarfélög eru sammála um markmið laganna að auka vægi langtíma stefnumörkunar í efnahagsmálum. En þá þarf að auka samráð við mótun fjármálastefnu og fjármálaáætlunar til þess að markmið náist s.s. um afkomu og efnahag, fjármögnun opinberrar þjónustu og verkaskiptingu ríkis og sveitarfélaga. Samráðsfundir sveitarfélaga og landshlutasamtaka með ráðuneytum verði tímasettir í takt við vinnu að fjármálastefnu og fjármálaáætlun.
- Fjárlög hvers árs verða í minna mæli en áður breytt í meðförum Alþingis. Mynda þarf því traust um að brýn hagsmunamál hafi tímasetta áfanga ríkisfjármálaáætlunar s.s. í uppbyggingu innviða og opinberra stofnana í héraði.

Því er beint til fjárlaganefndar að taka þessa þætti upp í nefndaráliti og beina þessum ábendingum til ráðuneyta.

Endurskoðun frumvarps til fjárlaga 2018 með tilliti til hagþróunar landshluta

Hagþróun landsins í heild er samkvæmt fjárlagafrumvarpi á góðri leið og efnahagsaðgerðir eru unnar út frá þeirri stöðu. Fjórðungssamband Vestfirðinga bendir fjárlaganefnd hinsvegar á skýrslu Bygðastofnun og Hagfræðistofnunar Háskóla Íslands, Hagvöxtur landshluta 2008-2015.

Tæp tvö ár eru síðan fyrsta skýrsla sömu tegundar kom út að hálfu sömu aðila. Fyrir Vestfirði má sjá jákvæð áhrif af vexti í fiskeldi og ferðaþjónustu en á sama tíma hafa sjávarútvegur, landbúnaður, fjármálaþjónusta, húsbyggingar og opinber þjónusta dregist saman. Áhrif þessa má finna í samantekt skýrslunnar þar sem segir; *Laun á ársverk eru lægri í fiskveiðum á Vestfjörðum en annars staðar og meðallaun á ársverk í öllum atvinnugreinum eru aðeins undir landsmeðaltali árið 2015. Fasteignaverð er hvergi lægra en þar. Staðgreiðsluverð á fermetra í sérbylí var 88-89 þúsund krónur að jafnaði árið 2015, rúm 40% af landsmeðaltali.*

Fjórðungssamband Vestfirðinga telur að fjárlagafrumvarp 2018 taki ekki nægjanlega tilliti til mismunandi hagþróunar landshlutanna. Því verður að ítreka umsögn FV varðandi Fjármálaáætlun 2018-2022.

Fjórðungssamband Vestfirðinga harmar að í forsendum ríkisfjármálaáætlunar er ekki tekið tillit til mismunandi stöðu landshluta er varðar efnahagslega og samfélagslega þróun. Fjórðungssamband Vestfirðinga telur að þær efnahagslegu aðgerðir sem lagað eru til í áætluninni muni leiða til skaða byggð og atvinnulíf á Vestfjörðum. Fjórðungssamband Vestfirðinga skorar því á stjórnvöld að endurskoða Fjármálaáætlun 2018-2022.

Fjórðungssamband Vestfirðinga er hinsvegar ljóst vegna skamms tíma við afgreiðslu frumvarpsins, er óvíst að komið verði á endurskoðun frumvarpsins hvað varðar mismundandi hagþróun landshluta. Markmið nýrrar ríkisstjórnar í byggðamálum sem sett eru fram í kafla 8.2 eru jákvæð í þessum efnum og ekki síst það markmið um að efla þátt Sóknaráætlana landshluta. Hér skal þó ítrekuð sú ábending hér í upphafi umsagnar er varðar kröfu um breytt vinnulag við fjármálaáætlun, fjármálastefnu og fjárlög.

En hér verða nefnd nokkur þeirra brýnustu málefna sem gera verður kröfu um að verði tekin til skoðunar að hálfu fjárlaganefndar.

Samgöngumál

Fjárfestingarframlög.

Í gildandi framkvæmdahluta samgönguáætlunar 2015-2018, er gert ráð fyrir framlögum í upphafi framkvæmda við nýjan veg yfir Dynjandisheiði á árunum 2018 til og með 2021 og um Veiðileysuháls á árunum 2018 til og með 2020. Frumvarp til fjárlaga fyrir árið 2018 eru þessar framkvæmdir ekki tilgreindar í nýframkvæmdum á næsta ári (d. Fjárfestingarframlög bls 263).

Mótmælt er þessu misræmi milli áætlana ríkisins, því að óbreyttu verður um að ræða frestun á að bjóða megi út Veiðileysuháls og Dynjandisheiði eins og samgönguáætlun 2015-2018 segir til um. Hér um að ræða grundvallaratriði í að koma á heilsárssamgöngum á milli byggðalaga á Vestfjörðum og grundvallaratriði um framtíð byggðar í Árneshreppi.

Markmið og aðgerðir (bls 264-266).

b.liður.

Fjórðungssamband Vestfirðinga leggur áherslu á að framlög til almenningsamgangna á vegum landshlutasamtaka verði hækkuð til að mæta uppsöfnuðum rekstarvanda. Minnt er á að samningar landshlutasamtaka og Vegagerðar um almenningsamgöngur renna út í lok árs 2018. Í stjórnarsáttmála nýrrar ríkisstjórnar er kveðið á um eflingu almenningsamganga og því þarf að treysta rekstargrunn verkefnisins.

c. liður

Vakin er athygli á því að frumvarpið gerir ráð fyrir að tillaga í fjárlagafrumvarpi frá 147. löggjafarþings standi óbreytt og því verði „unnt að bjóða út eftirfarandi verk: Hringvegur/Hornafjarðar-fljót, Hringvegur/Berufjarðarbotn, **Vestfjarðarvegur/Gufudalssveit**, Uxahryggjavegur, Kjósarskarð, Dettifossvegur og Snæfellsnesvegur/Skógarströnd.“

Fjórðungssamband Vestfirðinga minnir hér á langvarandi pattstöðu (15 ár) með Vestfjarðaveg um Gufudalssveit. Stjórnvöld verða að vera tilbúin með fjármagn til að hefja framkvæmdir á þessum vegkafla hvernig sem niðurstaða verður í því máli, með jarðgöngum eða þverun Djúpaþfjarðar og veg um Teigsskóg.

Rétt er hér að tengja við ályktun um 600 manna borgarafundar á Vestfjörðum.

„Borgarafundur á Vestfjörðum 24. september 2017 vill að mat á samfélagslegum áhrifum verði í framtíðinni lagt til grundvallar stórfamkvæmdum og lagasetningu þegar það á við. Jafnframt setur fundurinn fram eftirfarandi þrjár kröfur:

- **Ráðist verði strax í vegagerð í Gufudalssveit samkvæmt leið P-H (um Teigsskóg), vegna brýnna hagsmuna sveitarfélaganna, atvinnulífsins og íbúa**
- Raforkumál á Vestfjörðum verði færð í nútímabúning með hringtengingu Vestfjarða um Ísafjarðardjúp, þannig að atvinnutækifærum fjölgi á Vestfjörðum.
- Laxeldi verði áfram heimilað í Ísafjarðardjúpi og í því ljósi setji stjórnvöld fram, fyrir árslok, ákvæði um nauðsynlegar mótvægisáðgerðir til að verja laxveiðiár í Ísafjarðardjúpi gegn hugsanlegri hættu á erfðablöndun“

Tillaga er síðan um hækkun um 1,5 milljarða til að bæta umferðaröryggi og til að greiða úr umferð og minnka tafir. FV gerir að tillögu að liðurinn verði hækkaður um 200 mkr og fjármagni verði veitt til að hefja framkvæmdir við Veiðileysuháls í Árneshreppi í samræmi við samgönguáætlun, en vegurinn er að meðaltali lokaður um 3 til 4 mánuði á ári og tefst umferð bíla samkvæmt því.

f. liður

Jákvætt er að hækkun er á framlögum til hafnarbótasjóð eftir að framlög til sjóðsins voru lækkuð verulega á árunum eftir hrun og hafa síðan í raun staðið í stað. Framlög til sjóðsins þurfa hinsvegar að hækka á næstu árum til að mæta brýnni viðhaldsþörf og eins til að mæta nýjum verkefnum.

g. liður

Mótmælt þeirri hversu lítil hækkun er á framlögum til flugvalla og flugleiðsögu í innanlandsflugi, en fjárveitingar voru því sem næst þurrkaðar út eftir hrun. Uppbygging tækjageymslu við Bíldudalsflugvöll og lagning slitlags við Ísafjarðarflugvöll eru mál sem nefna má í þessu samhengi, auk úrbóta á flugleiðsögn.

Fjarskiptamál

FV fagnar því nýja markmið sem sett er fram (bls 267) um að *Að 99,9% lögheimila og fyrirtækja eigi kost á a.m.k. 100Mb/s þráðbundinni nettengingu árið 2020.* Verkefnið Ísland ljóstengt hefur gengið hægar á Vestfjörðum vegna fjarlægða og dreifbýlis og of mikill kostnaður er lagður á fámenn sveitarfélög. Það eru hinsvegar vonbrigði að ekki er tillaga um hækkun framlaga til verkefnisins á árinu 2018 og lagt er til að framlagið verði hækkað undir fjárlagaliðnum eða sem sértæk byggðaaðgerð.

Orkumál

Á stuttum tíma hafa langtímahorfur í orkumálum á Vestfjörðum breyst til hins betra. Virkjanaáform gefa vonir um að auka orkuframleiðslu raforku með vatnsaflsvirkjunum um 130 MW. Með góðu skipulagi á flutningi raforku frá þessum virkjunum má koma á hringtengingu um Vestfirði og gera svæðið sjálfbært í sínum orkumálum. Auk þess að skapa tækifæri til uppbyggingar nýrra atvinnugreina innan landshlutans. Einnig er unnið að úttekt á bættri nýtingu jarðvarma á Vestfjörðum m.a. með uppbyggingu hitaveitu á Hólmavík og víðar. Framangreint mál tekst ekki nema með samstilltu átaki ríkis og sveitarfélaga og þar er lykilatriði að stofnanir ríkisins og félög í þess eigu hafi fókus á málinu.

Hér er rétt að tilgreina samþykkt 600 manna borgarafundar á Vestfjörðum.

Borgarafundur á Vestfjörðum 24. september 2017 vill að mat á samfélagslegum áhrifum verði í framtíðinni lagt til grundvallar stórframkvæmdum og lagasetningu þegar það á við.

Jafnframt setur fundurinn fram eftirfarandi þrjár kröfur:

- Ráðist verði strax í vegagerð í Gufudalssveit samkvæmt leið P-H (um Teigsskóg), vegna brýnna hagsmuna sveitarfélaganna, atvinnulífsins og íbúa
- **Raforkumál á Vestfjörðum verði færð í nútímabúning með hringtengingu Vestfjarða um Ísafjarðardjúp, þannig að atvinnutækifærum fjölgi á Vestfjörðum.**
- Laxeldi verði áfram heimilað í Ísafjarðardjúpi og í því ljósi setji stjórnvöld fram, fyrir árslok, ákvæði um nauðsynlegar mótvægisáðgerðir til að verja laxveiðiár í Ísafjarðardjúpi gegn hugsanlegri hættu á erfðablöndun“

Landbúnaðarmál

Fjórðungssamband Vestfirðinga lýsir áhyggjum af framtíð sauðfjárbúskapar á Vestfjörðum vegna tekjuskerðingar í greininni. Sauðfjárrækt er víða lykilþáttur í atvinnu og samfélagsgerð sveitarfélaga á Vestfjörðum, sveitarfélaga sem hafa haft í vök að verjast með tilliti til byggða- og atvinnuþróunar. Hér má einnig benda á að vegna fábreytni atvinnulífs og strjálbýlis er erfitt að finna eða sækja í aðra atvinnu til að styðja við rekstur sauðfjárbúa, því sé veruleg hættu á að sauðfjárbúum fækki á Vestfjörðum. Slík þróun er í raun ótæk með tilliti til hagsmuna sauðfjárræktar á Íslandi, þar sem Vestfirðir eru hreint svæði með tilliti til sauðfjársjúkdóma. Vestfirðir eru einnig sá landshluti þar sem vandi vegna ofbeitar er lítt til staðar og gæti landið í raun þolað meira beitarálag.

Fjórðungssamband Vestfirðinga leggur því til að sett verði fjármagn til að gera úttekt á þeim tækifærum sem felast í sérstöðu sauðfjárbúskaps á Vestfjörðum. Slík úttekt verði nýtt til að vinna nýjar tillögur sem verði til að efla sauðfjárbúskap á Vestfjörðum í stað þess að draga úr honum.

Fiskeldi

Eldi á laxi í sjó hefur vaxið hröðum skrefum á Vestfjörðum á síðustu árum, mestur er vöxtur á sunnaverðum Vestfjörðum en einnig í Dýrafirði og Önundarfirði. Áform um uppbyggingu í Ísafjarðardjúpi eru í biðstöðu vegna tillagna í áfangaskýrslu starfshóps um stefnumótun í fiskeldi.

Áhrif þessara uppbyggingar er lýst skýrslu KPMG um hagræn áhrif fiskeldis í Ísafjarðardjúpi, sem unnin var fyrir Atvinnuþróunarfélag Vestfjarða og Fjórðungssamband Vestfirðinga nú í september s.l.. (Skýrslan fylgir með þessu erindi).

Hér er rétt að minna á að skýrslan nær eingöngu til Ísafjarðardjúps, en ef tölur eru uppfærðar miðað við útgefið burðarþol fiskeldissvæða á Vestfjörðum, má með nálgun nota margfaldarann 2,8 til að yfirfæra niðurstöður KPMG fyrir Ísafjarðardjúp á alla Vestfirði. Samanlagt má telja að um 70 þús tonna eldi verði komið upp á næstu 10 til 15 árum, miðað við 80 þús tonna burðarþol. Áhrif þessa eru sem hér segir;

- Heildarverðmæti má áætla að verði því um 65 milljarðar
- Bein störf 730 og afleidd störf um 420, samtals um 1.150 störf (þar af er nú talið að um 200 störf séu þegar kominn á Vestfirði miðað við um 10 þ tonna framleiðslu en stuðullinn er hár í upphafi eins og KPMG bendir á).
- Íbúapróun, miðað við þegar bein störf eru í hámarki að það fjölgi um 2.500 manns m.t.t. ruðningsáhrifa. Leggja má það mat að þessi 200 störf sem þegar eru kominn að þau standi á bak við um 400 - 450 íbúa. Nettófjölgun er hinsvegar minni, en við sjáum bara fjölgun í Vesturbyggð um 130 manns frá árinu 2008, í öðrum sveitarfélögum á fiskeldissvæðinu er enn fækkun, en eins má segja að þessi uppbygging hafi komið í veg fyrir meiri fólksfækkun að óbreyttu og hugsanlega hrun í einhverjum byggðalögum.
- Arðgreiðslur til ríkissjóðs verði 2,8 milljarðar á ári (Dýrafjarðargöng leggjast á rúmlega 9 milljarða) og um 700 mkr renni til sveitarfélaga, þegar flest bein störf eru til staðar og framleiðsla kominn í hámark

Miklar fjárfestingar eru því framundan á Vestfjörðum með fjármagni frá einkaaðilum. En framangreint mál getur tafist verulega ef ekki tekst að ná fram samstilltu átaki ríkis og sveitarfélaga og þar er lykilatriði að stofnanir ríkisins hafi fókus á málinu. En á undanförunum árum hafa sveitarfélög orðið þess ítrekað vör við að stofnanir ríkisins gefa þessu málum á Vestfjörðum, lítinn áhuga og eða bera við mannafls og fjármagnsleysi. Afgreiðsla á umsóknum fyrirtækja af hafa af þessum sökum tafist um mörg ár.

Það er eðlileg krafa að stofnanir geti sinnt sínu lögbundna hlutverki og það er því jákvætt í að sett er nýtt markmið í kafla 13.2 nr 4.2. (bls 279). *Rannsóknir og vöktun áhrifa fiskeldis á lífríkið sem stuðla að því að við uppbyggingu fiskeldis verði gætt úrustu varúðar í samræmi við ráðgjöf vísindamanna þannig að líffræðilegri fjölbreytni verði ekki ógnað.*

Fjórðungssamband Vestfirðinga telur mikilvægt að sækja þekkingu til annarra landa þegar lítið er til mögulegra mótvægisáðgerða til að draga úr hugsanlegan skaða á líffræðilega fjölbreytni vistkerfa. Við endurskoðun laga um fiskeldi telur FV telur einnig mikilvægt að heimilt verði skipulagt eftirlit með gögnum laxfiska í árkerfi og einnig að lítið verði til ákvæða um gildistíma leyfa til laxeldis. En í dag skortir heimildir til að takmarka eða stöðva laxeldi ef óvænt neikvæð umhverfisáhrif koma fram eða eftir atvikum skaði á líffræðilegri fjölbreytni.

Rétt er hér að tengja við ályktun um 600 manna borgarafundar á Vestfjörðum.

„Borgarafundur á Vestfjörðum 24. september 2017 vill að mat á samfélagslegum áhrifum verði í framtíðinni lagt til grundvallar stórframkvæmdum og lagasetningu þegar það á við. Jafnframt setur fundurinn fram eftirfarandi þrjár kröfur:



- Ráðist verði strax í vegagerð í Gufudalssveit samkvæmt leið Þ-H (um Teigsskóg), vegna brýnna hagsmuna sveitarfélaganna, atvinnulífsins og íbúa
- Raforkumál á Vestfjörðum verði færð í nútímabúning með hringtengingu Vestfjarða um Ísafjarðardjúp, þannig að atvinnutækifærum fjölgi á Vestfjörðum.
- **Laxeldi verði áfram heimilað í Ísafjarðardjúpi og í því ljósi setji stjórnvöld fram, fyrir árslok, ákvæði um nauðsynlegar mótvægisáðgerðir til að verja laxveiðiár í Ísafjarðardjúpi gegn hugsanlegri hættu á erfðablöndun“**

Menntamál.

Fjórðungssamband Vestfirðinga tekur undir markmið um eflingu framhaldsskóla og háskólanáms.

FV beinir til fjárlaganefndar að taka til umfjöllunar málefni fræðslumiðstöðva en fjárveiting þeirra hefur staðið í stað frá hrúni og er þeim í raun ekki lengur kleift að halda úti starfsemi sinni. Vísað er til erindis Fræðslumiðstöðvar Vestfjarða í þessum efnunum.

FV beinir til fjárlaganefndar að framlag til Háskólaseturs Vestfjarða verði hækkað að lágmarki um 10 mkr til að koma á nýrri námsleið, Sjávarbyggðarfræði. Framlagið legðist þá jafnt á móti framlögum sem Sóknaráætlun Vestfjarða og fleiri aðilar hafa samþykkt í verkefnið, auk framlags Háskólaseturs. Í heild er áætlaður kostnaður við verkefnið um 35 mkr á ári. Vísað er til erinda Háskólaseturs Vestfjarða til menntamálaráðuneytis sem send hafa verið ráðuneytinu á þessu ári, nú síðast þann 12. desember s.l. Beiðni byggir á tillögu í skýrslu nefndar forsætisráðherra um samfélags- og atvinnuþróun á Vestfjörðum (sept 2016).

Umhverfismál

Fjórðungssamband Vestfirðinga fagnar þeim áfanga að lögð er til fjárveiting 20 mkr, við gerð fyrsta strandsvæðaskipulags á Íslandi í tengslum við áforma um framlagningu frumvarps um skipulag haf- og strandsvæða. Minnt er á frumkvæði vestfirskra sveitarfélaga og Fjórðungssambands í þessum efnunum með gerð nýtingaráætlunar Arnarfjarðar. Rökrétt er því að fyrsta skipulag strandsvæðis á grundvelli nýrra laga verði á Vestfjörðum.

Málefni Árneshrepps

Sveitarfélagið ásamt Fjórðungssambandi Vestfirðinga hafa um áratuga skeið barist fyrir uppbyggingu innviða og eflingu samfélagsins í Árneshreppi en með takmörkuðum árangri.

Byggðastofnun hefur samþykkt umsókn Árneshrepps um að sveitarfélagið gerist þátttakandi í verkefninu Brothættar byggðir. En telja verður að nú sé samfélagið á þeim tímamótum að skýr svör þurfa að koma frá stjórnvöldum þ.e. til viðbótar verkefninu Brothættar byggðir, um áðgerðir í innviða-, atvinnu- og samfélagsuppbyggingu. Hér er þörf á samstilltu átaki ríkis og sveitarfélagsins og þar er lykilatriði að stofnanir ríkisins hafi fókus á málinu.

En sett á oddinn þá er það lykilatriði að tekin verði ákvörðun um að veita fjármagni til hefja endurbyggingu vegar um Veiðileysuháls á árinu 2018. Í samgönguáætlun 2015-2018 var áætlað að setja 200 mkr í þá framkvæmd en í heild var verkefnið metið um 700 mkr á árinu 2015. Ekki er tillaga um verkefnið í frumvarpi til fjárlaga 2018 eins og kemur fram í umfjöllun um samgöngumál hér að frama. Þess er krafist að fjárlaganefnd fylgi þessu máli eftir við ráðuneyti og stofnanir í umfjöllun um frumvarp til fjárlaga 2018.

Ótímabundið verkefnafjármagn héraðsbundinna stofnana, sléttuð út við endurskoðun heildarsamninga.

Fjórðungssamband Vestfirðinga hefur hér upphafi greinargerðar lagt til nýtt vinnulag í samskiptum landshlutasamtaka, ráðuneyta og Alþingis. En hér við afgreiðslu fjárlaga 2018 verður að taka tilliti til að verið sé að þróa verkferla og það verði að vera mögulegt að grípa inn í einstaka fjárlagaliði að þessu sinni. Ráðuneytin hafi í tilfellum sett fram tillögur sem munu að óbreyttu hafa slæmar afleiðingar fyrir rekstur stofnana á Vestfjörðum. Tillögur sem hefðu þurft aukið samráð / samtal um áður en þær voru settar fram og hefðu ekki komið fram í breyttu samskiptaumhverfi ríkis og sveitarfélaga.

Málasvið 17.20 Rannsóknir og vöktun á náttúru Íslands.

Fjárlagaliður 14.403. 121 Náttúrustofur. Fjárlagaliður lækkar um 20,5 mkr úr 162,1 mkr í 141,6 mkr. Hér er um að ræða lækkun á sérframlagi til Náttúrustofu Vestfjarða og Náttúrustofu Húsavíkur. Samkvæmt skýringum UAR, þá er unnið að gerð nýrra langtímasamninga við náttúrustofur og samræma þurfi samninga. Lækkun framlaga Náttúrustofu Vestfjarða (Nave) mun nema um 10,1 mkr eða úr 27,8 mkr í 17,7 mkr. Af þessari skerðingu eru 8,8 mkr vegna ótímabundins framlags sem komu inn með tillögu í fjárlögum ársins 2008¹. Markmið tillögunnar voru í megindráttum að efla starfsemi Nave og að vera hluti af stærra verkefni þ.e. að efla atvinnulíf og efla rannsóknar og þróunarumhverfi á sunnanverðum Vestfjörðum með nýju stöðugildi Nave á því svæði. Fjórðungssamband Vestfirðinga krefst þess að þessi tillaga fjárlaga 2018 verði dregin til baka og framlög til Nave hækkuð. Stjórnvöld hafa ekki kvikað frá því markmiði að efla samfélög og atvinnulíf á Vestfjörðum og gengur því tillaga um lækkun gegn þeim markmiðum.

Vísað er að öðru leiti til erindis Samtaka náttúrustofa til fjárlaganefndar þann 15. desember s.l..

1

Fjárlög 2008

14 403 112 Náttúrustofa Bolungarvík Efling starfsemi stofnana innan Þróunarseturs Vestfjarða á Patreksfirði Lagt er til að veitt verði 8 m.kr. framlag til að efla starfsemi stofnana innan Þróunarseturs Vestfjarða á Patreksfirði með það fyrir augum að efla atvinnulíf og samfélag í Vestur-Barðastrandasýslu. Gert er ráð fyrir að verkefnið verði á sviði fiskeldis, ferðaþjónustu, fugla-, gróðurs- og vistfræðirannsókna og nýsköpunar í atvinnurekstri. Með samþykkt þessarar tillögu er gert ráð fyrir að bæta megi við einu stöðugildi hjá Náttúrustofu Vestfjarða. Til viðbótar er gert ráð fyrir jafn háum framlögum til Atvinnuþróunarfélags Vestfjarða og Rannsóknar- og fræðaseturs Háskóla Íslands, og er sótt um þau í sérstökum tillögum á fjárlagaliðum Byggðastofnunar og Háskóla Íslands. Alls er því sótt um 24 m.kr. í frumvarpinu til þessa verkefnis í heild, auk þess sem sótt er um 5 m.kr. til þess í frumvarpi til fjárlagaliða fyrir árið 2007 á lið Byggðastofnunar. Tillagan er hluti af ráðstöfunum sem ríkisstjórnin ákvað að grípa til með hliðsjón af skýrslu nefndar um leiðir til að styrkja atvinnulíf á Vestfjörðum.

Leiðrétting framlaga.

Málasvið 14.1. Stjórnun ferðamála. Fjárlagaliður 04-551. 101 Ferðamálastofa.

Fjárlagaliðurinn hækkar um 283,3 mkr, þar er að hluta breyting á samningum Ferðamálastofu við Markaðsstofur landshlutanna sem lið í eflingu markaðastofanna. Tillaga er um að 80 mkr framlag renni til hækkun samninga (bls 285) sem er jákvætt og í takt við áherslur í stjórnarsáttmála nýrrar ríkisstjórnar. Hinsvegar er slæmt að tillaga í fjárlagafrumvarpi 2018 sem lagt var fyrir 147. lögjafarþing er um framlagið verði að fjárhæð 91 mkr, sem er lækkun um 11 mkr. Unnið hefur verið nú á síðustu mánuðum að endurskoðun samninga á grundvelli herra framlags og mun að óbreyttu setja þá vinnu í uppnám. FV krefst þess að þetta verði leiðrétt og fjárveiting hækkuð að nýju í 91 mkr.

Rétt er að vekja athygli á að texti greinargerðar fjárlagafrumvarpa 148. og 147. lögjafarþings um kafla 14.1 er óbreytt að öðru leyti. Því er líklegt að hér sé um að ræða mistök í framsetningu.

Ísafirði 18. desember 2017

f.h. Fjórðungssambands Vestfirðinga



Aðalsteinn Óskarson, framkvæmdastjóri

Fylgiskjal.

Laxeldi í Ísafjarðardjúpi – greining á áhrifum þess á efnahag og íbúapróun. KPMG (sept 2017)

Laxeldi í Ísafjarðardjúpi – greining á áhrifum þess á efnahag og íbúapróun. Skjákynning.